

2 TTESARONIKE OHO DZAIRA PEPA IPINA

Pauro ma Siira ma Ttimotteo
Koritti, Girisi
Tii 52 (Mae 53)

Ttesaronikaho Oko ma Boto
Ttesaronika, Maketonia

1 ¹⁻²Dzoobe Dzairamane:

Nike Ohonga mai ma Dzesu Kiristu Soopara napameho oko ma
boto tupunita nopo i hasu ma keba nikeho quba dzoobiremi Qaru abi
tapari nanai nike pobi hiire.

PAUROI TTESARONIKA ABIHO HASA HIRETA

³Maqa, nike iso keke qesa qesaho quba dzasa eetemi nikeho ai tatauma meupu
naatemi nana nookorai. Oonita Dzairamane, nanai nikeho quba Ohonga hasa
hiibaquho isaki naate oorai. ⁴Oi abi sigina qesai nike dzakidzaki eete kaipo
samaneke moitemi nike peperataamake ai tataumata battigara naatemi nanai
Ohongaho oko ma boto tupu samaneke oho pobi qidza hiiremi qaki naataridzoni.

OHONGAI BATABIDZA ABI MEENOMA

⁵Oonita nike Ohongaho pobi quba heme oonomake saridze oorami
Ohongaho mumure naatemi noi maripa maikhata qidzanita bamu ruume
naataqu. ⁶Oho quba qesai nike oonomake eetorai nokoke Ohonga noomae
oho ipi ma ari quba bamenoma moitakoita qupadzomare.

⁷Oonita Dzesu Kiristu Soopara napahoi Angero beedzaenoma ooma
gama qusu neta baa paana naataquita nikema napa gama qidzata
oorakoi. ⁸Oonihe qesai Ohonga ruume naate Dzesu Soopara napameho
sinabidzake basesa oonoma eetoraike noi eepama ittobidzakoi.

⁹Nokoi baura qanga nokomeho ipike bamu Ohonga Sooparaho nese ma
pati qidzake mooraqu, bamu noho beedzae ma dzapa pobi mooraquhe

noho purabake saridzorakoi. ¹⁰Qate nike nanaho sinabidza nookaqi tani naatetaho isakita noi biranataquho bodzata nike noke Buububuuiqi hiibakoi.

OHONGAI NOKO BEEDZAENOMAITARE PAURO HIIRETA

¹¹Oonita nanai nikoho quba pupu hiireqi hee, O Ohonga, nii nokoho kira hiiremi nokoi eto ai tatauma mae baura qidza niiho teeta peperataino mae soubidzaama naataino. Oho isakita nii nokoke beedzaenomaitemi oho isakinipamu naatare. Oke eete pupu samaneke hiirorai. ¹²Hiiroraiho quba Ohonga mai ma Dzesu Kiristu Soopara napahoho baruna heenai nikoho irita baura eete qaama nike Dzesu Sooparaho dzapa qusubaite hasa hiiremi noi oho qesa nikoho hasa hiibakoi.

KAHOSA MAIKHATA BASESANOMA

2 ¹Oonihe dzairamane naname, Dzesu Kiristu Soopara napahoi kebanoke biranatempi napai gama noho dzagata ttutturatakoi. ²Oho quba nike etoqa qupani mae tooma erake hiibaino, Oo Kiristuho bodza ao dzamoiteiqi hiibaino oho qesa eto teei nanaho qaseqase eete gee teeke qeeteqi oonomaho totohota hiibaino.

³Qate, etoqa teei nike poma teema teeta ikobetaino. Oi oho bodza biranataamake oomi bosata abi hii kharai Ohongake papatanipamuke eete kahosaho dzubinanipamu oi biranate paana naatakoi, noi abiho isaki baatanoma tee oni. ⁴Noi sama nome qusubaiteqa qaheuba biirihio isakita habeseqa hee, Anaio qoberoba minarake riitorai, Ohongake riite ooraiqi hiireqa abi minarai noomaebo subesube hiiba qubake noi tototo hiibakoi.

⁵Anai bosata nikoho bisata ooqi oke hiiremi nookatanita qupadzomare. ⁶Oi Ohonga noomae noke poiqa qaanatempi paana naataamake oorai oke nike paha gesina oi teeho bahe noho bodza biranatempi paana naatakoi.

⁷Oonita oho poma qesaqesa aoke abi qase dzoomoriahe noho bodzanipamu biranatempi Ohongai noke qaanataama naatempi biranatakoi. ⁸⁻⁹Oonita basesaho maikhatai khina khoina ma ikoiko samanemba biranate paana naatakoi.

Oi Saata noomae noke isakinomaitemi noi noho puita qooroqa qaseqase ma obaoba ma mumure oberaobera samaneke abiho neseta paanaitakoi. Oonihe Soopara Dzesu Kiristui baaqa Sumasa noho toona biranatorai ooma abi qanga oke ngausa eeteqa baura nohoke bikhi bakha eetakoi.

¹⁰Oonihe sinabidzai abi qesa samaneke qidzaitempi qidzanatarorihe abi samanei oho goottae naateqa abi qanga ikoikonomo nohota atimare qupadzomakoi. ¹¹Oho quba Ohongai qaanataama naateqa hiiremi nokohota qupa dzohidzohi obera oi nokohota dzuubami nokoi oonomaho ikoikota atimakoi.

¹² Oi erake eete oorai. Abi qesai noo mee arabireqi tete qanga oonomaho dzaodzao eete qaamake Ohonga oho ipike nokoke batabidzakoi.

AI TATAUMANOMAI TETE MAINATA QEEMAKOI

¹³⁻¹⁴ Qate Dzairamane naname, Soopara napahoi nikeho quba dzasa eeteqi dzapa hiireqi Sumasa nomema nike dzeima qaimi nike sinabidza meeke ai tataumami qidzaitemi ponapona nohoho isaki naate ooraike paha kebanoke Dzesu Kiristu Soopara napameho dzapa pobita oorakoi. Oonita nanai nikeho quba Ohongaho torota dzoobe hiire qaarakoi.

¹⁵ Oho quba dzairamane, nanai tooma bapotopotorai mae geeta qeete banaitorai oho sinasinake nike aimanipamuke eete ota qoro tatanga naatare.

¹⁶ Oionita mooro. Ohonga mai ma Soopara Dzesu Kiristu nopo napaho quba dzasa eeteqi baruna heenata qaraqara tatanga moitemi napaho paramu ma too tetateta qidza naate oorai. ¹⁷ Oho quba noi paha qupa nikehoke kharuba teeteqa hoobiremi nike too ma samama gama baura qidza samaneke eetorare.

NOKOI PUPUTA HOOBIDZAREIQI PAURO HIIRETA

3 ¹ Qate Dzairamane, noo qesaquesa paha hiire. Nike nanaho quba pupu hiiremi nikeho torota sinabidza meupu naatoraiho isakita paha nanaho botota meupu oi ipibire tuuma haba igabidzare. ² Ma paha abi qesai ai tataumaamanita eto nana abi qanga basesanomaho botota taatainoiqi nike pupu hiibare. ³ Oi Ohonga Sooparai ruume naataama, noi isanate nike too teeteqa qangaho totaqita bakena geomorakoi.

⁴ Oi nanai pai qesaquesa nike moitemi nike qusubaitorakoiqi Soopara napameho pengata qupadzmorai. ⁵ Qupadzmomami noi nikeho qupa pobitemi nike Ohongaho dzasa oho tete saridzeqa Kiristuhu pookeba samakeba gesina naatakoi.

SAMA BAURAHO NOO QESAQESA

⁶ Qate paha nanai qogo ma saga nike pobi hiireta oke aimata oonita nike nookami qesai noo qusubaitaama naateqi sepesapeke tuusumi nike meenipamuke nokoke papatare, oke nanai Dzesu Kiristu Sooparaho dzapata hiiremi nooke.

⁷ Nookare. Nanai nikeho bisata buu ma dzake eete baura eetotanita nike oho teteke suimare. ⁸ Oi nanai tegaha abiho botota patta qonoqono teeqake aima muunara oonihe qanga ma kaipoke eete etebake sama baurake eteqi quipabek gisihoke eetemi nikai nanake oho iga hiibarotaho tete te biranatara.

⁹ Oi nanai nikeho torota qonoqono saridzarota oio nanaho pobi. Onihe nike tete nanahoke suima qubake nanai te oho qonoqono aimara.

¹⁰Nanai nikema ooqi erake hiireta, Teei baura tee ma teeke eetaama naataquko noke eto sepeke patta moitemi muunaino.

¹¹Oke teeoh quba hiibaranihe nana nookami nikelhota qesai seno naate haba ogamaqi iseresere hiire tuumorai. ¹²Abi oonomake nanai Dzesu Kiristu Soopara napameho pengata qupanomaiteqi hee, Nike noo qaasuhiq a baurata qeemaqa patta ooqata saridzorareiqi hiire. ¹³Oonita dzairamane nike baurata qaaqa etoqa goottae naatainohe battigara naatare.

¹⁴Qate nanaho nooi dzaira pepa erana biranatorai oke teei basesa etaquko noke qupanomaiteqa potti biiremi noi midzake qupadzomaqa qupa burisi eetare. ¹⁵Oi nike eto hairiamake noke hee, Iboniqi hiibainohe noke hee, Dzaira gotta napameniqi hiireqa noke pobipobiitemi qidzanatare.

¹⁶Ohonga Soopara napahoi hasuho maikhantanita noomae poma qesa samaneta nike hasu ma keba moitorare. Oonita Sooparai nikema gama qaarare.

¹⁷Maqa dzaira pepa dzoobirorai oke ana tooma hiiremi qeetoraihe dzoobe hiireqi dzapake boto namema mumure mooto qeetemi nike moora. ¹⁸OONITA DZESU KIRISTU SOOPARA NAPAHOHO BARUNA HEENAI NIKEKE TUUHORO QAARARE.

Anaio Pauro